

四庫全書

集部

欽定四庫全書

集部  
抱犢山房集卷一至三

詳校官庶吉士<sub>臣</sub>汪彥博

助教<sub>臣</sub>常循覆勘

總校官編修<sub>臣</sub>王燕緒

校對官修撰<sub>臣</sub>張書勲

謄錄監生<sub>臣</sub>祝雯

欽定四庫全書

集部七

抱犢山房集

別集類六

國朝

提要

臣等謹案抱犢山房集六卷

國朝嵇永仁撰永仁字留山別號抱犢山農無錫人康熙十三年耿精忠作亂永仁在總督范承謨幕同被拘繫承謨遇害永仁亦死難四十一年追贈國子監助教是集前三卷曰

吉吉吟百苦吟皆其陷獄時與承謨及同諸人唱和詩曰和淚譜則為同難諸人所作小傳也第四卷曰葭秋集第五卷曰竹林集乃其舊刻第六卷附錄同難會稽王龍光華亭沈天成二人之詩文雍正中其子曾筠編次付梓永仁以諸生佐幕尚未授官而抗節殞身義不從逆其所為詩文皆縷述當時實事獄中不得筆墨以炭屑畫於四壁閩人重其

人品錄而傳之得存於世今誦其詞奕奕然  
猶有生氣與范承謨畫壁諸詩同為忠臣孝  
子之言不但以文章論矣乾隆四十六年十  
二月恭校上

總纂官

臣紀昀臣陸錫熊臣孫士毅

總校官

臣陸費墀



嵇留山先生傳

姜 塗

先生諱永仁字留山別號抱犢山農晉侍中紹之  
後祖居虞山父中書公以官居金陵先生嘗遊梁  
谿樂其山水家焉年十六補博士弟子員未幾食  
餼居家恂恂孝友生平無書不讀制舉而外雅好  
詩古文詞下筆千言立就顧數奇屢躋場屋鬱鬱  
不得志先生以父母年老出就館穀尤精於醫所  
至活人無算殆將安貧養志藏器以終身矣范忠

貞公諱承謨者太傅文肅公仲子也中書公與太  
傅有舊忠貞公撫浙時雅聞先生名思折節下之  
先生乃以故人子進謁公一見深許有國士之目  
適奉命督閩延入記室邑侯吳公置酒為餞酒酣  
賦踏莎行詞多感語先生心不欲往中書公曰中  
丞以國士相待揖汝為上客讀書所學何事顧不  
為知已用耶且太傅舊誼何可忘促之行先生室  
楊氏抱二子曾筠右丹送至吳門止外家之紅橋



莊外是日天色甫明薄霧漫水面送者佇立河干  
淚泫泫下若不勝慘切生離之狀先生曰嚴父命  
敢不往顧念兩大人年過七十汝歸善事堂上撫  
吾子吾行思所以報知己無為我戚戚也遂鼓棹  
而去入閩過仙霞嶺謁關夫子廟禱於神曰余此  
行佐范公救民也若萌利欲心必奪我嗣聞者震  
悚咸知先生志不苟矣甲寅春逆藩耿精忠將叛  
先生請於范公曰事迫矣與為忠臣寧為良臣盍

早為備因為公畫策請撥協餉補綠旗額兵安插  
逃弁酌議屯田冀收拾人心殺賊勢又請假巡海  
之名提輕兵駐上游制賊方是時會城文武大吏  
及公麾下士皆預中賊餌公號令格不行先生嘆  
曰吾輩不知死所矣有間賊偽張筵宴公先生誠  
勿往公曰吾大臣以死報國將安逃乎挺身往賊  
果誘公閉密室隨下先生及同事者於獄被逮時  
得卒數十張弓矢執白刃驅之若就西市先生了

無怖色謂同難王生龍光曰予兩人氣誼頗同死  
之日願魂魄聚一處王生亦應聲許諾義形於面  
是刻天光慘淡日氣昏濁先生處亂屍血窪中俄  
迫至逆邸脅之降不從促草安民檄不從誘以官  
又不從賊怒甚欲置先生死地乃假章奏事令鞠  
者窮詰指為禍首先生毫不置辨曰死何足惜但  
願一見范制府得瞑目耳賊無如何乃命錮之先  
生在獄蓬首垢面械鎖銀鐐寒暑燥濕蟣蟲蚊蚋

攢眉之苦靡不徧嘗方之文信國之坐小樓其苦  
什百也因作百苦吟忠貞公與同難諸君子俱屬  
而和之先生工詩尤善填詞少所作遊戲三昧一  
種膾炙人口至是悲思憤鬱所作皆極淋漓沈痛  
不堪卒讀賊甚惡之防範嚴密禁絕楮墨乃燒枵  
存炭圍著作於四壁入夜陰房鬼火照見壞牆字  
跡熒熒飛舞先生擊節而歌羽聲悽愴聞者唏噓  
泣下范公寄語先生曰死吾分也君何自苦為先

生曰死於忠與死於義一也各宜努力幸勿為念  
幽繫凡二年於康熙丙辰九月十七日范公遇害  
先生聞之仰天痛哭曰所不即死者欲從公有為  
也今已矣遂自縊死同死者紹興王龍光松江沈  
天成瀋陽范承譜三人次年

王師進勦福建平制府上其事部議以先生係諸生無  
贈銜例令所在給優卹銀若干兩先是賊以殉難  
諸人屍骨毀棄郊野三山林子能任覓先生骸骨

製棺殮之至是先生之僕程治得扶櫬歸方先生之殉節也室楊氏僅二十七歲聞之水漿不入口誓以身殉後以舅姑老子幼忍死守節仰事俯育如荼集蓼凡二十八年次子早夭卒撫其長者成立壬午曾筠舉孝廉楊氏以節婦建坊表閭而范公之子時崇開府廣東念先生之忠且義力請於朝得以諸生

贈官國子助教崇祀范公祠蓋異數也丙戌曾筠成進

士讀中秘書

天子稔其家世每

禁試咨賞者再丁酉擢置

講帷

特授山右學使者曾筠清廉有守所得皆寒暖晉人士  
稱祝之人咸謂天之報施忠節不爽云

金定四庫全書

傳



欽定四庫全書

抱犢山房集卷一

錫山 嵇永仁 撰

詩

吉吉吟 并引

吉吉吟者何東田嵇子於甲寅三月同中丞范公罵賊被繫禁錮難所至初冬之夜夢遊東嶽見諸靈異都非惺境已而仙吏降階延佇似昏熟識者仙吏身

後各有一役抱一大硯不知何義想亦掾曹之屬供  
紙筆於殿上天子耶寤後境猶在目知非恍惚之所  
結構遂倩人齋香楮丐神明之我告神示以籤曰石  
榴花發後此事甚分明至今佩二語於胸臆間耿耿  
如也越一日又夢仙吏執手板於側余叩之曰自何  
所來答曰斗部他無所語再叩之不應但以手板默  
示余凝睇其上有吉吉理侯四字其蓋包藏余之歸  
期乎人生流浪海中其苦無涯生寄死歸熟計已久

時至即行無復痛惜所難忘者垂白之老親耳天或  
憐念東田子之死非死於貿貿而欲鬻利危疆也非  
死於懵馬冥馬而不知速去以遠害也乃死於義也  
死於義則天何忍使義士之老親不得所於家鄉耶  
此又不可必而可必者也余於積病之中著百  
苦吟和淚譜又東田醫補十三卷其餘正欲次  
第闡發奈禁錮已久病患愈深起居之際不能  
支持著書之事從此寢置余之半生苦心血於

鉛槧者亦徒結來世之緣而已矣誠恐形神一離有  
筆難述尚就可以攤紙吮墨之時隨意所欲吟輒筆  
之於篇總以吉吉弁其首云

秋夜次蒙谷韻

范制府在難中筮得  
蒙卦別號曰蒙谷

寒衣何處授徹夜紙窗明節近天香遠人稀鬼火生枕  
書多是淚死國亦無名千水千山路捐軀自有情

鉅蘭次蒙谷韻

嗟哉王者香幽谷紛未靜採擷人自喧詎奪山中性春

風不入惟秋月照孤境賴此數日妍芳馨彌老勁

雨夜詠杞次蒙谷韻

蕭蕭風雨落花茵海角天南擲此身泣擁牛衣無少婦  
卧虛布被愧平津寒來空自聞敲練冷到方知有結鴉  
裘葛與君為故物未能消受總酸辛

雨霽卽事次蒙谷韻

北馬南轅何所圖麟愁鳳泣為誰拘卧聞嶺上風雲合  
棲向籠中羽翼枯腐血錐心魂自黯熬形鍊骨氣難蘇

壯年贏得成衰老雨後顏唐酒一壺

癸丑秋邑侯吳公餞余於聽梧軒招集秦太史對  
巖陳進士椒峰暨詞客父山夫余澹心諸子同  
拈踏莎行調末以憔悴二字限韻詞中有孤城  
殘角夢家山亂帆影裏人憔悴之句余心怦怦  
動歸述之老父欲不果行老父曰相國舊誼其  
忍負之遂促余行至幕府日輒病脅痛號欲絕  
恐屈不祿之辰歸念頗切舉顛末告之蒙谷蒙

谷為余解憔悴之意亦和一詞詞內有云城郭  
無光村煙失翠瞥然一見心如醉停驂暫緩入  
山期哀鴻待爾離憔悴余讀之驚愕私謂許子  
九日曰言者心之聲也何為作此不祥語許子  
亦悚惕相對咨嗟知將不免因決情而去卒脫  
於難余緣情勉強留遂逮於禍非知幾之暗也情  
所感激不忍去也不忍去而去非但薄情抑并  
悖義嗟乎嗟乎禍患有因端倪先兆今日憔悴

至於此極余固久知之矣乃作憔悴吟

余本抱犢人東臯有荒田荷鋤將經營課僕耕雲煙天  
南節度不肯放聘書早到薜蘿邊薜蘿間挂處士牆處  
士一去令君傷招攜賓客置餞觴吐詞製調魂飛揚有  
心負米戀草堂堂上念舊催治裝可憐離別九迴腸陟  
嶺逾灘躋險峻一步一望吳天長羈棲伏枕藥壚間海  
濱倦鳥思飛還好音慰藉情淒婉勸我停騶遲入山好  
友掉臂行病夫銜淚住張羅設網日月昏冥冥鴻去



無路雨雪從來霰集成  
蒼龜四體先分明  
自是愚忠被束縛  
休嗤野客迷歸程  
吟來憔悴看雙鬢  
只恐秋添宋玉情

被難之日尚挾鈔本  
秘書數冊恐其窮搜  
因預探而出之

秘書幾卷出懷中  
委向泥沙黯淡同  
過目雲煙皆幻物  
驚心文字亦飄蓬  
青氈無計偕歸嶺  
白袷何由再御風  
若使上林徵著作  
茂陵詞賦故園空

分啖白石榴

炎方產果物得此朴素質寄來憂患餘分甘口難述結  
體大如拳含漿潤同蜜備嘗艱苦人離離飽其實我昔  
夢東嶽靈境天剖出殿上瓔珞垂殿下冠裳即明發再  
叩神神語生凜凜盼取榴花後便是分明日花發子既  
結尚在幽暗室觸景乃迴憶莫非應驗疾禍福不可言上  
帝重陰隲我公能格天風雷任颺颺生死皆得所慎勿  
懼斧鑕

從前相依蒙谷者受其恩卓其德盡為衣冠中之  
穿窬及受難日此輩皆不與豈奸狡之徒巧於  
攫金者亦善於避禍歟余與林翁能任王翁幼  
譽沈子天成皆落落寒素家無儋石之儲堅守  
硜硜之志與公誓同患難不畏刀鋸不豔勢利  
逆雖百計挫磨初心不拔彼奸狡者應抑掄呆  
漢之捨生取義也為作顛倒歌

顛倒英雄孰是非伯夷餓死盜跖肥太史著書發悲憤

問天不應增歎寒儒好古艱遇合牢落科場遭踐踏  
肉眼豈識璞中玉銷魂還逐風前蠟家徒四壁依傍人  
巧者致富拙受貧憂讒畏譏嘆維谷猶幸知己愁眉伸  
道義相交澹如水金多交深物所鄙小人有母孰養之千  
里輕身浪擲死死忠死義原相成惟有罔極魂縈縈山  
鬼揶揄誇明哲閭里溫飽翻偷生辜恩報恩君莫計世  
上休輕天下士金烏玉兔疾如梭千秋難解顛倒意請  
君熟讀顛倒歌英雄英雄可奈何

蒙谷每逢

慶辰輒望北再拜詩以紀之

古人每飯不忘君忠孝何曾患難分鐵鑠久嘗心似鐵  
雲山難阻氣如雲但求北極星辰拱忍對南冠鬼火焚  
那得因風生感悟盡銷壁壘付斜曛

王幼譽夢同登金山寺題樓額以開陽二字應之  
北固高樓俯萬尋往來繫棹一登臨夢中尚作揮毫客  
江鳥江花共短吟

其二

暘谷開時浴火珠渡江春色柳梅俱樓頭收盡無邊景  
記得分明是此圖

索藥書

我讀軒岐書平日甚了了自謂此中人心目始分曉雖  
無折肱勤亦既窮要渺危病偶一試庸醫顏色悄方知  
神聖徒不在萬物表出門攜藥籠男婦輒環繞頗能去  
疾苦壺天未嘗小即在禍患餘起疴亦不少誠恐先朝

露著書盈寸杪精力日以衰筆墨覺繁擾方帙散與衆  
冀拯枉共天公裕濟世懷顛沛尚矯矯視人有痛癢酷  
似茹荼蓼為我覓殘書痼瘵謝億兆

寄養生書囑令鈔存

余家中散公好習養生言才多而識寡不獲終天年鍛  
鍊柳樹下彈琴竹林邊飲酒好放浪傲晚權貴前其意  
薄人世但願為神仙子孫多修逸猶得讀遺篇仙家書  
浩瀚精微難以傳所留雖糟粕亦能破拘牽公在蒙難

時几席列瑤詮探討如熟悉寄我意拳拳洲島邈難即  
樓居復述遭靜觀聊意會恩義等雲煙安能寫黃庭猿  
鶴相周旋

病中與沈子天成

萬折千磨病體纏秋宵起倒一絲懸勞君燃火炊糜熟  
夢阻還家半覺眠

其二

藥椀參苓日所須而今伏枕尚躊躇艱難始識天心好



消受平生粥一盂

余輩在難所夜不貼席每晨輒斲卧難起林翁晨  
興料理鹽水糜粥為賦辛苦篇

辛苦復辛苦老翁殊太賢鮮衣美食數十年一朝患難  
自炊烟我輩頓忘服勞義紅日曝腹猶斲眠翁本宋代  
文昭後淵源理學名家胄蚤歲投筆慕蕭曹繡衣御史  
斂容就海隅明末擁唐藩參軍一官且拂袖擾擾塵氛  
不可知欲隱山顛與水湄攘臂下車愧馮婦履尾猶幸脫

藩籬裏糧棄家遊方外元戎下士虛左待疆場正值用  
兵時牖戶網繆桑梓賴鯨鯢出沒繫安危招徠恢復  
知為誰盈庭無如李閣部節制八閩安邊陲運籌決勝  
視帷幄大丰皆出翁所為樓船勦海紛紛舉請修文德  
罷師旅紅毛謀入中國巢䟽陳養虎未蒙許臨終遺草  
開漁禁欲俾遷黎早得所更是孤兒處危疑老臣有子  
淚盈楮防微慮遠翁德高交情生死敢辭勞至今每讀  
樹滋集撫掌歎息人中豪英雄若以成敗論我曹難免

逐泥糞推心置腹伊何流一籌莫展空拳奮鎖聲琅琅  
柝聲淒與翁起坐聽寒雞勸翁且復就高枕明日敲冰  
和菜羹

蒙谷以炭畫壁自云目之為狴犴聲

孤臣畫壁炭痕香十日熬饑絕水漿叫破帝閭俱是淚  
嘔殘心血更何傷留題觸手無斑管得句驚魂對土牆  
只恐他年重拂蘚斷章零落泣斜陽

冬夜夢迴月照孤影聊以誌感次蒙谷韻

憶公趨神京後車前旄旌祖帳紛絡繹縞紵贈分明握手盡賢詰登堂叙弟兄所重在道義殊覺意氣橫輦下久濶絕鄉相猶知名輪蹄日滾滾暗觸紅塵驚外吏縱清貴焉知內崢嶸鴻鵠遭彈射弋者思遠征此鳥薄雲霄網羅安可擎愧彼高蹈蹤出處心交怍

聖明未敢負事業殊難成非若太平時張弛無變更公來當其厄飲恨復吞聲報國惟捐軀延喘待時清留取啣雪志無玷丘園情僕本爨下餘亦復同

哀鳴梁溪溪上泉濯足兼濯纓此願不能遂翻身騎長  
鯨讀公還家夢英風吹北平

燈前梅影次蒙谷韻

凍蕊苞含霜雪痕吹香散影若生根怕隨籬落沾餘土  
盡掃鉛華慰斷魂屋角酒杯難一醉天涯紙帳幾同溫  
無端飄墮成孤質寒鳥啾啾叫破垣

偶成

貧女自村野使君覺姣好不以色事人進退一以道妒

金匱要略  
卷一  
者集如蜎視之若蒿草蒿草有時枯金石不可槁迴視  
眉黛人能得幾偕老區區樸陋安患難實為寶

籠中畫眉次蒙谷韻

夙昔隔人境飲啄自靜好徘徊郊外山棲止雲際鳥撫  
躬雖渺末氛祲無足惱青鳥傳素書黃雀啣至寶是物  
各有奇志豈謀梁稻誤墮虛聲中塵垢不能漂生死屬  
他人禍福奚足道閭苑有瓊枝玄圃有瑤草舊時嬉戲  
場拘墟空在抱此身寄樊籠此心戀野老

覽鏡中白髮次蒙谷韻

漫誇龍鳳大夫姿何似山郊祝壽眉用世自然難避世  
酬知馬敢效無知三分駿影惟存骨一種顛毛但有絲  
不分此生憔悴盡旁人猶道是情癡

蒙谷以炭畫紙上書顏杲卿伯夷蘇武三古人相  
詢欲擇一為決絕地也但被執大罵求死既不  
得十日絕水漿求死又不得是杲卿伯夷天已  
不欲令其繼之也無已請學蘇武為作擬古詩

常山舌既乾兩耳了不聞聲留白刃間遲迴過陰雲首  
陽腹已餒薇蕨徒芳芬精氣彌豪放鼎食安足云維彼  
蘇屬國持節牧羗羗十年如一日冰雪嚼紛紜求死既  
不得堅志豺虎羣從容與激烈大道原無分上林白雁  
札終得達

聖君願言勵忠悃天心將罷軍

紀異

香煙繚繞壽亭祠千古衣冠繫所思忍使忠良遭陷溺



先教烈火自焚帷

甲寅三月望晨署中闕帝祠神幔空中舉火自焚

鳥雀空靈得氣先知幾無復戀簷前人間兵氣猖狂甚

入屋紛紛似避鷗

是月之內簷雀如鷗鼠狀悉避入屋內

貯水凝空瓦缶盈朝朝挹注藉澄清無端聲割如冰裂

從此兵厨不問羹

厨堂外有貯水大缶容數十汲者忽然寸裂

扁鑰重門霜較嚴下帷童子絕窺覘如何黑夜聞排闥

屋上狐狸影自潛

幕府鎖鑰夜間如有物出入及平明封閉如故

官扇迎頭舞向風馬前儀衛去匆匆天清日白迴飈急

五帝祠邊沙蔽空

蒙谷是日馬過五帝祠其掌  
扇無風自舞從者竟不能持

秋夜夢回紀舊事次蒙谷韻

尚方賜藥拜恩濃  
紫禁宵傳出秘封  
刻刻五雲馳慰病  
盤盤大內撤殊供  
身當逆難堅金石  
夢到雲霄渥鼎鐘  
自是臣心通北極  
遙知南望淚千重

初度自嘲即次蒙谷寄祝原韻

人生四十更何為  
仗劍天南負所期  
平世虛生留氣魄  
危途迴立見鬚眉  
關山涕淚庭幃悵  
遠賓主伶仃天地悲

還憶田間農圃舊短衣破帽也相宜

其二

一到兵厨滋味忘  
飡茶茹藥覺尋常  
萬千苦盡天心在  
九十春深馬齒強  
鬚鬢星霜前歲白  
形骸土木近來蒼  
老親倘記兒時事  
蓬矢桑弧總斷腸

其三

野鳥於人何所圖  
網羅驅迫阻江湖  
風波匝地身粗健  
骨肉全家眼已枯  
國難到今縫掖重  
塵埋此日壯懷孤

青春莫恨無花放，留取花開向晚途。

其四

買犢將耕溪上田，田荒犢老客途遙。  
誰能沈醉忘平日，我獨知非早十年。  
仙佛學來塵劫內，柏松歷過歲寒邊。  
何時重整犁鋤具，夢想桑麻已隔緣。

其五

寄我新詩慰我情，遙知義在萬緣輕。

蒙谷題抱犢吟見贈有義在萬緣輕

生死遙相守之句

衣冠文物蒙塵垢，襦被琴書付亂兵。  
病裏兩

年神愈旺歌來百感氣俱平人間若不逢霜雪桃李春  
風浪得名

其六

檢點年華次第吟清明纔過雨淋侵儒編盡向風塵誤  
醫學新從患難深幼子愚頑留侍祖孤身陷溺賴知心  
古來忍詬還強力世上浮名酒漫斟

有云蒙谷步履難移起立需杖扶之聞而嗚咽與  
林翁掩面揮淚

公年纔四十憂國髮早白況嬰非常變戈戟相逼迫挺  
身蹈鋒刃殺者翻愛惜明知不可屈復恐縱羽翮正在  
危急時天地走霹靂電掣金蛇光雨噴神龍液晝夜晦  
冥中燈火慘然碧欲操生死權到此亦無策重牆加禁  
錮遂與人世隔勺水粥半盂精力就枯瘠寸步倚孤筇  
艱難在咫尺有時肆訕罵左右皆辟易人生無忠孝何  
以持氣魄我與諸同儕忝公座上客聞聲而噓唏淚落  
腸崩坼誅孽與扶良天意方顯赫

月下松濤次蒙谷韻

皎皎窗櫺月照此衣內珠澹泊類禪寂聲沸心常孤  
泐泐如奔濤萬馬爭須臾已在金戈中何暇慮崔符誠恐  
天宇崩衽席無良謨去歲雷雨震陰陽儼合符今歲大  
風發赤子難藏軀丁男習鼙鼓老弱供役夫十家九出  
門陰屋走妖狐境外野狼集境內猛虎驅寧任虎狼食  
患難不相扶當其處堂時燕雀笑人迂蕭牆佈荆棘決  
裂暗遠圖神龍一露尾豈能顧頭顱我非明哲材頗稱

抱杞徒憂天不卹身未免死道途夏日猶若此冬夜非  
有殊心骨亦以摧遑復問肌膚憔悴二三子兀坐室西  
隅寒暑共徧反何時步通衢死者業速朽生者尚故吾  
願天早息兵賊首先伏誅逍遙松風前掉頭洗塵污

蒙谷寄心經說義覽之頓覺身世皆空亦火宅中  
之清涼散也系以詩

齊梁佛教入中國翻譯金經重石刻自此點證西來心  
便覺塵網縛羽翼名教大端在君父語言文字點楊墨



究竟生死是苦海尋津覓岸此為得遭逢劫火性命輕  
不空諸有即迷惑鼓山衲子演宗風開堂說義破茅塞  
髡翁原屬過來人焚香靜悟手一則大千毫髮照鬚眉  
日月經天何可蝕却掃蒲團向上叅此經化作青蓮色

蒙谷見遺雪藜

五內俱煩熱渴飲不得漿雖鄰大道側綆短愁汲長火  
雲大如輪炙手如沸湯家居名泉里輕身去故鄉夢寐  
九峰下涓滴生清涼如何墮羽翼陷溺摧肝腸握此香

水黎感激意相將平日推食心固結為哀傷曾幾變寒暑遂致成滄桑入口猶唾餘沁骨誠難忘願與同懷子甘苦始終嘗

餉蜜羅柑

藏柑前歲寄高堂三山方物殊清香不得太平同一啖  
羈囚異地心徬徨徬徨分食難下咽兩載相思不相見  
劈破盈盈似淚珠吞聲還復甯頭戀此柑漫說甘如旨  
天下酸心未若此

對顛僧

鎮日向魑魅無如對此僧  
笑來天際闊癡絕道懷增  
弄腕馳風雨忘機掃葛藤  
不知奇險地偏自踏寒冰

蒙谷見示云欲寄微物將意守者不從為之悶絕  
敬答

東南鼎沸何物有但願骨肉今速朽  
求死不死天胡為  
欲寄故人遭掣肘鯨鯢作浪風波邊  
借問幾時安枕眠  
夢魂各自能來往  
留取寸心明月圓

贈王龍泉守備

壯士不負心臨難獨慷慨秋霜寒肌膚百折亦何害飲  
酒飽啖肉豈肯就狼狽平生殺人多此身無沾帶生死  
等閒間主恩總難昧偷顏祈苟活名節將焉賴黃金養  
健兒大半是狡獪但鼓脣與舌水火成冤會希圖保妻  
子罔知忠孝大違衆懷抱同君家稱奇最斷葦學佞佛  
萬事出天籟

侯翁舊將也年已七十矣隨公南來有妾相從

紀氏

處州人

年未滿四十難作之日自經而死一僕婦

一蒼頭同時并死噫亦烈矣哉

侯翁徐州之賢豪彎弓遼左筋力熬壯歲馳驅能自立  
出入營伍多勤勞致身建節貔貅上衝鋒冒敵邊海瘴  
數十戰陣飽經嘗老年氣槩益精旺甘心閒散歸舊里  
芒碭有田買耒耜攜家原為報恩來節度當年恩重哉  
覆巢生死不可知正是裙釵決絕時臧獲相隨黑夜月  
耿耿黃泉淚流血

七月二十八夜大風吹瓦自四鼓至次日巳時雨  
淋淋不止僵立其下冷顫欲死為賦怪風歌

大風吹瓦落葉飛天昏雨急穿四圍蓬頭赤脚如鷺立  
毛羽濕盡無所歸淋漓水深積尺許危檣逆浪爭幾微  
傾山撼嶽森嚴威金戈鐵馬聲依稀人生患難至此極  
空羨季女守斯饑季女斯饑巖穴端縱然陋室亦清安  
任他拔木牽蘿補即有傾盆當瀑看出門正踏危機內  
何止凍餓稱艱難矣蒸寒濕疫癘攢蟲蠅蛆紛成團

戾氣所鍾，蹇難觸呼盧使酒生波瀾，驚魂未罷驚又起。  
一日恐懼千萬般，為公死，豈偷生？公尚在死無名百年  
之內，怪風少此風，應感天地情。

漂母吟贈祝子再賡

淮陰窮餓日垂竿，遇漂母進食，哀王孫此意自千古。僕  
在瑣尾中，蛇鬼混為伍。夙昔廝養兒，攘臂亦作武。唾穢  
滿牀頭，低聲不敢怒。拚此垂盡身，輕人若糞土。豈知刀  
砧餘尚復，戀故主。上天鑒寸心，皮骨未盡腐。雖然昏濁

時塵外各有取祝子英雄姿冰雪濯肺腑結交第一流  
賢豪屈指數卓立清白軀不肯傍廊廡以此邁奇禍忌  
之類猛虎同時受縲紲笑談忘痛苦殷勤識故舊林翁  
驚相覩性命須臾間且復勸酒脯屋烏轉施愛與僕話  
縷縷私意竊許可鯁生非狂瞽偏處慰晨昏疾病憐咻  
噢僮僕日投殮未嘗問風雨幸免食粗糲充飢安貧窶  
我非封侯相欲報君何補只此一飯恩緩死力重努

和幼譽早春詩



天時人意想陽春剛到春來笑此身凍雪已消遲暮恨  
寒花空憶小園貧炎方霽景推今日多難題詩有故人  
漫道彩鞭喧令節也知亂後各傷神

蒙谷詠牆角仙人掌詩中垂念余病詩以答之

一枝浪擲土牆根道是仙人掌上痕端為孤臣憔悴裏  
天開雙蒂說迎恩

其二

不服參苓已兩年每逢入夏痛熬煎憐余間阻殷勤問

多少深情毫素邊

訊林翁所覓書

老人覓得幾般書  
夢蝶乘牛道所居  
獨有淮南子書好  
少年漁獵愧生疎

毛子賓留除夕在禁寄饋燭炭

楚冠同戴不同名  
爾為官來我捨生  
親在許人憂轉愧  
家忘為國辱偏榮  
蠟消除夜風前淚  
炭熱寒宵雪內情

善易年來應更進  
漫持河洛問君平

賓留善  
河洛數

有人製新服見遺裂而返之

苦殺王孫不受憐側身狼狽意陶然綈袍氣暖顏凝厚  
短褐毛穿骨愈堅挾策驚聞官況好埋憂甘作楚囚顛  
升沈異地真懸絕從此雲泥道路邊

蒙谷眼力模糊寄詢方書藥物

眼光豈似漆患難總蒼茫淚染模糊影愁看戰伐場方  
書還自檢藥物仗誰將何日開眸子浮雲掃大荒

柳絮行

昨日街頭賣菜傭道是楊花滿城郭  
落水沾泥舞向風  
嘆惜朱顏賤揮霍東家西舍掩空帷  
別引春光入簾幙  
嫁壻莫嫁從軍兒  
地北天南恩愛薄  
弓衣箭室壁生塵  
物在人非惱閨閣  
前年跨鞍爭出門  
誓將飲馬黃河源  
吳嬌越豔生致取  
區區糟糠安足論  
事勢蹉跎歲月緩  
枕戈卧鐵蟻蟲滿  
天道順逆常分明  
塞翁得失難預算  
藁砧志氣多驕矜  
自家枕畔不曾暖  
只道鴛鴦易作鄰  
拆夫散子俱笑嗔  
誰識故園飄柳絮  
顛狂片片點芳茵

生死沙場歸未得翻令家雞亂撲人

搖尾行

搖尾復搖尾母乃當年之黃耳可憐走街衢三載不得  
肉沾齒低頭宛轉聽人呼路旁老兵將手指此犬當初  
遭秦養福寧甲帳曾棲止朝出獵斑馬鳴夕掩圍狡兔  
死鷹驕隼怒誇得禽捷足郊原無若此虎冠鎮將愛殺  
商海濱抽刃如屠豕金銀玉帛堆成丘後房子女前塋  
篋推牛未肯厚養士狗欄日食分庖羞春風顛撲白日

變昔時部曲今仇讐旌麾錦絡亦已矣蛾眉皓齒隨波  
流珊瑚既碎珍珠泣煎膏焚齒非無由獨餘此犬少著  
落蹄寒骨瘦聲啾啾殘漿冷炙便苟就何人拉上南山  
頭

士子下第後改治春秋未卒業輒遭禍亂念此事  
未了仍向友人借書窮研走筆紀謝

鼓篋嘗受書鯉庭重風雅鄉塾所面命埋頭壇坫下窮  
年問毛公四始理瀟灑偏側走科場知稀遇合寡清秋

嘆獲落鉞繫傷草野誰遺數卷來同學手鈔寫云是  
獲麟篇校定不苟且公穀鑿鴻濛安定設壚治時乖而  
道危此義未嘗假深愧記性拙日夕手重把管窺甫及  
半喪亂吞聲啞文章棄如土性命擲如瓦喘息今尚存嗜  
好獨牽惹死生固有分讀書志難捨向君借琅函一了  
夙業者

李生

李生貌不揚下筆能文章鬚禿尚淹滯資身無一長妻

子厭藜藿十日九未嘗寄居市廛中徒手奚所將公來  
慰流離收拾附宮牆分俸給月餼骨肉完糟糠此意余  
獨解鼓勸誠忠良鴛者猶不棄駿者感難忘一朝禍患  
作鼎沸如探湯甲帳走鼃鼃朱簾羅刀鎗驅赴殿角門  
拷掠先受傷余輩四方客同時遭桁楊維子隸宇下怪  
惡行與藏極刑聲痛苦大聲呼彼蒼公也念瘡痍開界  
活羣氓棄地多膏腴屯田在墾荒富國兼足食庶幾撐  
海疆立談偶相合被錄受恩光條陳諸機宜事事皆心



傷訖驗果非謬加罪真豺狼鬼薪楓亭驛血淚灑道旁  
黑獄二三子憂汝櫻鋒銍筆楚壞筋骨饑寒鄰死亡近  
聞里巷傳形骸尚未僵伶仃舊妻孥行乞共一方我家  
幾千里黯然魂飄颻

劉紀綱

太傅初入關紀綱年少小喘息隨鞍羈待漏驚天曉來  
往承天門入直五雲表抱禍還進食左右身繚繞從征  
絕邊塞冰霜凍飛鳥經月無人烟汲水百里少咄哉黃

頭郎飛騰類驤褭雖多諸健兒不及此奇矯體會在意  
先忠厚省煩擾馳策三十年老大心憂悄買馬赴危疆  
賣價供茶麥風波赤地起巢傾類俘俘束縛遭窮究宦  
索詎微渺聞言氣激昂口舌休妄掉我主為清官天下  
人多眺撫浙四載餘逋累尚環繞東南財賦鄉未嘗愛  
寸草況茲閩海窮何忍困億兆請君檢囊橐百金用未  
了此乃馬價貲蒼天所皎皎籍者意沮喪白圭色愈皦  
道路吞聲哀重閭冥且杳

祝子再賡贈被

地折天摧雲日黃與君同難各踉蹌  
網羅開後關心處  
襟被攜來穩夢鄉  
落魄無親空慰藉  
知音賴爾識佯狂  
庭除兒女盤桓足  
莫憶風波惱斷腸

書寄

炎海春三月傾覆梧桐枝  
疾飈驚鳳凰  
誤遭羅網羈  
昔鳴高岡上  
今為羣鳥欺  
延頸不食粟  
心記朝陽時  
生理既斷絕  
遠與丹山辭  
早脫塵埃去  
免為夔龍嗤

丙辰六月初七日暈

臺上占天禍福端  
陽烏黑暈盡團團  
禁中象緯書難覓  
大抵還從分野看

病中三日不飧矣林翁為余治羹感而賦贈

老翁偃僂向火爐  
離披櫛拙烟模糊  
手提五味作湯液  
殷勤勸我傾盤盂  
腸枯腹槁不知餓  
病中三日還伊吾  
生平善病怕伏枕  
所以形瘦肌骨癯  
蒙谷關心悉此狀  
養神切囑還相呼  
也知筆墨耗精氣  
其如思慮無時無

暫教揮灑吐胸臆猶得遣愁離斯須感翁厚仗翁扶脫  
非我翁旁調攝寧待今日歸山隅

七夕前二日為內子生辰口占遙寄

銀漢迢迢不動波鉞樓兒女指天河明朝未必牛郎渡  
添得年華愁裏多

小院深秋拭淚頻三年三度好青春白頭吟在何曾負  
薄倖難為離亂人

范文肅公神影懸舊署被扃婦女歲時斂錢奉祀

感而紀以詩

太傅遺恩在難忘患難中久疎家廟禮猶帶野芹風  
弭雖微值香花幸未空帝庭如不遠陟降慰孤忠

我僕

我僕去何急點兵赴海灘畫旗秋色苦白羽夜光寒  
問慰今何賴存亡汝更難未能攔道哭愁逐戰雲端

螢火

長夜苦難睡深房飛一螢似猶親故物全愧治專經  
勢

撲燈檠火光凝屋漏星此身翰羽翼出入破幽冥

聞蛩

蛩吟秋共苦伏枕乍為聽宵柝淒方切鄰砧響未停初  
寒驚露白將曉厭燈青榮落籬邊菊三年淚總零

多病

秋來復多病何以遣吾情已識形骸累難將寒熱爭攤  
書頭易眩擁被夢常驚輾轉還需藥持錢付老兵

癸丑秋余婦送至吳門止於外家之紅橋莊是日

集賢堂詩集 卷一  
天色甫明薄霧漫水面乳嫗抱兒輩佇立岸上  
若不勝慘切生離之狀人非木石孰能無情每  
一迴思腸寸裂矣因作紅橋莊歌行

秋風蕩漾扁舟早雙槳到門攬懷抱薄霧籠煙水氣蒸  
鷄鳴桑樹催晨興懷中潔白鵞湖綾眼枯難拭淚痕凝  
良人遠遊意飛騰不知前路多寒冰雖然孤天分所應  
臨深履薄生戰兢上有高堂下乳稚養親教子將何憑  
出門兒女愁葛藤欲語不語長撫膺矯情揮袂急解纜



蕙葭搖落鳬雁升野老滌場將打稻漁翁撥刺亦開罾  
惟有征夫捨耕釣紅橋莊上畫欄凭

丙辰仲秋初旬值怪風雨

自是天心厭顛狂風雨來幾年頻見慣今日更奇哉葉  
落飄簷瓦光騰起劫灰由來烽火地昏黑不須哀

浪傳

烏鵲何關喜好音總未知大都天下事還在口頭碑厭  
亂人情劇思安

聖澤垂膏澤甘浪擲忍復見瘡痍

和幼譽病起原韻時中秋前五日

服食虛良藥蹉跎失意年青穉三載破白髮幾絲鬢瘦  
骨形尪甚新詩興勃然浪傳天上信桂在月中懸

憶曾筠右丹兩兒

恒居憐稚子繞膝自相親紙筆時偷弄詩篇記未真長  
貧今累母急難仗何人想到伶仃處天涯倍愴神

念別

乳媪抱兒出送我里門首舟子舉布帆云俟河濱久擊  
榜衝鳬鴨解纜離煙柳盈盈岸上淚淒淒杯在手豈不  
立逡巡業已辭林藪父母促治裝長拜出戶牖丈夫身  
許人難與妻子守但恐隔別來骨肉得全否眷懷梁鴻  
溪愁雲結巖岫

憶許子九日過灘詩有六時信歷三千劫一日真  
同數十驚之句宛似難中景象不勝歎息

許子先我歸婁東還家猶幸全高蹤口稱婚嫁不曾了

更復衰年難從我記得來時歷灘險驚魂把握溪流中  
那似江南鼓棹樂布帆無恙乘秋風似此欲前心反却  
回頭錯愕呼篙工垂老性命付一葉千山萬山愁無窮  
耽癖愛奇遊亦倦舵樓詩在感微躬徃徃念及神憂慄  
謀歸不忍首飛蓬天開地裂遭九死一生未卜將焉終  
忽憶我友灘邊句風波如此毋乃同

小僮

只有小僮在隨人馬足間經句看故主信口說時艱甲

帳秋方急芻糧夜未閒可憐渠病起征戍隔千山

中秋次幼譽原韻

傷心兒女月明中愁有蠻雲酸有風庭桂露邊頭共白  
江楓霜裏淚俱紅悲秋想去飄如葉未老頽然衰作翁  
山海戍兵何日罷一杯潦倒菊香叢

記夢

髮白雙親尚在堂嬌孫習字列有行抱書問母緣何哭  
道是余魂歸故鄉

囑林翁能任為余珍重殘詩

墨瀋荒唐滴淚殘酸風苦雨未曾乾此身若遂沈淪死

留與寒家子弟看

抱犢山房集卷一

欽定四庫全書

抱犢山房集卷二

錫山 嵇永仁 撰

詩

百苦吟 并引

昔人有言蟲生夢中胞胎悉苦余輩讀聖賢書學經  
濟事不能輝煌騰達自行宵臆依附得志者以行其  
道此亦無聊之極思矣迺復顛危窮迫逼處幽羈身

體髮膚空乏凍餓心志筋骨勞苦熬煎豈天將有意  
大降之任耶抑人處憂患之地而後善心生耶茫茫  
彼蒼莫能窮詰硜硜一介無惡可為意者我生不辰  
適逢其會歟然運數劫火仙佛唾餘悠悠庸妄無可  
奈何援此諉之於命而主持世道者不敢涉也公詩  
曰誤國愧虛名余每讀此低回者久之仁人君子之  
用心誠不因艱難險阻而輟其痼瘕悲憫之素志也  
春來筆墨久廢迴憶兩年親歷諸景啞然而笑漫然



為之遂成百首用炭屑圖於四壁蓼蟲自語其苦夫  
復何異同難二三子應聲而和真情實境不假思索  
吟者撚鬚未斷讀者觸心即酸聊作患難圖繪可也  
三家村老撲棗打油尚且流傳閭巷士女謳歌矧余  
輩之羽翼忠孝砥礪名節者哉故於詩成而系之以  
引抱犢山農識

### 颶風

海國年年起大風於今風勢撼蛟宮瓦飛木拔人摧仆

驚起羈魂碧落中

瘴雨

蠻煙毒霧雨傾盆  
濕盡炊煙火不存  
絕食淋漓拚禁錮  
何須行乞學王孫

積潦

水深三尺釜生菜  
人在園中水氣埋  
野鷺如何飛不起  
波濤平地最堪哀

炎蒸

解慍南風未可期  
爍膚如火烈風吹  
炎方豈乏清涼散  
煩惱塲中扇不宜

凍雪

六尺飛花是瑞胎  
三山盈尺作凶猜  
連年亂灑鵝毛片  
僵煞袁安做一堆

連陰

積霧沉霾深閉扃  
窺天不放一痕青  
無端盆覆奇男子  
愁鎖長空日氣冥

金匱要略  
卷二  
霉濕

乍晴乍雨熟梅天  
江北江南氣候連  
獨有海隅時序改  
四時蒸透破青氊

泥濘

閩俗風光著履紅  
不教誤踏在泥中  
餘生汨汨泥塗內  
何日登山倚謝公

昏黑

惱人無賴值黃昏  
黯黯愁雲易斷魂  
晚照柰榆還在目

衡門此際逐雞豚

昧旦

每到雞鳴睡不安  
五更心事半生難  
起來怕見掙擰面  
一枕天涯夢已殘

瞭燈

半明半滅影蒼黃  
照盡單衾瘦貼牆  
一卷維摩猶在手  
直疑禪舍佛慈光

屋漏

金匱要略卷二  
滴滴牀頭似淚懸和泥和水浸衣穿平生爾室原無愧  
不透天邊透雨邊

濕地

避乾就濕似僵魂枕石終宵氣不溫左臂至今成痛痺  
天留右腕筆空存

負暄

幾時曝背向蓉莊別去頻年荆棘長凍結鬚眉同北地  
南邊如此盼朝陽

旱澡

探湯未熟貯烏盆  
水人多攪易渾去垢  
未曾偏惹垢  
羨他江漢濯冰魂

蓬首

短髮和愁共作絲  
鏡中搔首嘆迷離  
憑誰櫛沐添憔悴  
結髮春閨知不知

垢面

神瘁形枯霜雪還  
行年四十笑顏顏  
何妨面目蒙塵土

自有光明照世間

攥手

誰云醫國補天工盡在淒涼袖手中總怕丹成飛欲去  
仙人掌上受牢籠

繫足

踏透層冰不怕寒如何寸步一身難却緣愛把滄浪濯  
留與風波局內看

拘頂



木吏無言虎踞憑相看頑鐵骨模稜書生不足鴛鴦頸  
空向星前扣赤繩

枯腸

左圖右史校讐年鄴架名山浩若煙此日著書無半部  
腹空搜索愧便便

淚眼

吞聲飲恨不曾乾漸覺模糊眼力酸縱有雲山難極望  
管中偷把上天看

聞柝

鬧煞沿門十甲牌柝聲  
敲斷喚巡街馬蹄猶自頻頻過  
攪亂雲山徹夜懷

聽砧

年年不見有寒衣  
刀尺聲中歲月非  
戍婦至今猶若此  
江南淚濕竇家機

鄰哭

白骨如山卧戰場  
塵羹土飯悼新亡  
近來巷哭多如許

只為清明到北邙

風鶴

難裏如絲性命微  
驚傳消息是耶非  
如予聽慣齊東語  
鷗鳥真忘禍福機

砲警

捲地奔雷響徹天  
危城氣勢觸蠻煙  
縱教掩耳偷餘息  
鼠穴驚魂已兩年

感粟

城上鳴鳴畫角聲秋殘春老總傷情千家按籍丁男數  
一月三迴聽點兵

鼙鼓

馬上鼙鼓道路悲衲襠拂袖助鐃吹商聲奏入軍中樂  
只合漁陽奮幾槌

笳吹

蘆管吹來日氣寒邊軍回首望長安海邦也為防邊設  
地北天南恨一般

吏稽

小吏傳軒罪籍呈乾坤無罪此身輕  
令嚴日日來稽察  
認作秋闈夜唱名

卒穉

木客山魃結一羣經年耳目鬼紛紜  
圖將五嶽誰攜佩  
白澤空中自護君

畫詰

圜牆黑霧罩通衢多少行人悲向隅  
念舊小奚來訊主

金瓶梅詞話卷二  
毒拳批頰血模糊

夜查

傍晚催人鎖鑰間  
琅琅震耳套連環  
龍鍾不似神蛟怒  
空費機心鐵樹關

值班

一波一浪送危帆  
閱盡潮頭踞石巖  
變態咆哮千百種  
直如燕子語呢喃

交更

暮鼓晨梆日夜嘈挨時記刻較分毫關情不似巡更雁  
漏盡鐘鳴枉自勞

臭蟲

破柱頽垣黑夜游蘭襟臭味不相投圓圓赤暈浮如粟  
噬盡頑肌當石頭

蟣蟲

王猛雄談定霸圖懷中捫出只些須誰教肉相非王佐  
只合供他飽餓夫

飛蠅

子耳常苦  
夜蠅飛入

讒言罔極怪青蠅蒙垢生平觸類憎充耳至今聽否慣

飛來掠去有何能

遊鼠

鼠曾咬  
子足指

陰房日夜走鼯鼯糞土牀前傾食盂茶味不堪供大嚼  
致教蹂踐到寒軀

聚蚊

炎鄉瘴海聚成雷毒口趨時撲又來巾幘鬚眉筋尚露



丈夫體勁不須哀

鬼啾

盡道陰房鬼火森啾啾叫徹五更心欲求雪痛招魂賦  
我正羈囚痛更深

疫癘

錯亂陰陽氣候乖網羅百口似枯荑霜飛六月知天意  
傳染如何雪上埋

碎衣

衣裳薜荔未為貧百結懸鶉耐幾春磨盡生平窮骨健  
傲他裘馬少年人

破被

買就零星敗絮來遮身此夜凍初回黑甜鄉裏還家夢  
不信天涯作死灰

砂鍋

甑破何勞顧盼為搏泥鑕火亦成炊庖犧五味從中別  
甘苦心脾只自知

泥鑪

焚檀炙桂夢徒然  
燕盡寒灰楫拙煙七十老翁愁足冷  
三冬夜夜傍他眠

瓦盆

孟水盤飧野老風  
蘼鹽啖盡有時空  
雖然易破猶能買  
留作堯衢鼓缶翁

草褥

肌骨相侵冰鐵痕  
芙蓉溫軟不須論  
印沙彷彿銜蘆雁

侵藉郊原草幾根

敝履

歷盡艱難烽火驕三千里外寄蹤遙  
芒鞋踏破圓扉窟  
畫地空思圯上橋

木枕

削木如拳卧不安  
驚心何夢到邯鄲  
曲肱雖是儒風味  
拋却南窗此地難

篋筐

蟻攢鼠耗攪塵羹食息需人為掃清  
賴得竹羅容納便行厨只此挈提輕

竹刀

減鎚銷鋒傳檄嚴手無寸鐵試蘸鹽  
雖然浪擲庖丁手抹煞鉛刀削竹籤

草珠

山妻囑付早潛修一串牟尼臂上留  
難裏衣珠拋失去菩提草粒費搜求

油簋

團扇流螢撲幾星  
冰肌無汗舊園亭  
年來溽暑蒸人劇  
一握芭蕉手未經

惡紙

萬緒千愁訴不成  
傳心端藉楮先生  
裁箋零落無雲母  
刻劃篇章消幾觚

臭墨

殘瀋如雲碧作藍  
鮑魚過肆味中含  
松煙半鈺能多許

薰透文心命不甘

敗筆

管城觸處破愁城吐墨吞毫百萬兵掃盡鋒鏑猶勝劍  
誅心斧鉞掌中擎

磚硯

端溪鸛鵒眼朦朧信手磨磚骨易鎔莫謂此田耕不得  
秋成應報舊山農

殘書

余過庠時有書一摺今盡失之搜懷中  
矣童子偶拾得數本見故物為之凄然

斷簡殘編走蠹魚  
零星收得當奇書  
可憐廿載鈔千帙  
半付家藏半亂餘

炭痕

初被繫時禁絕楮  
墨得句以炭畫牆

得句何嘗不淚垂  
更兼淚漬手中揮  
倩人墜掃勞多少  
清白流傳幾首詩

塵灰

臘月鄉風盡掃塵  
懸竿縛帚屋梁新  
兩年度歲仍依舊  
不見磨光刮垢人



煙昧

丈地泥爐處處燃霧中七里欲遮天炫人五色元黃戰  
只道山柴數縷煙

乞水

汲綆求人渴欲烹轆轤金井遠無聲問余家在名泉邑  
何事虛拋抱甕情

覓火

雪浪銀濤邊海城炎炎赤地祖龍坑此間偏乏桑榆火

借取鄰煙煮菜羹

摘菜

別盡根鬚洗盡泥煮來鹽味便成齏  
飢腸藜藿都相習  
心手艱勞不用提

執爨

析薪炊火度時艱童子呼來鈍且頑  
不若親身猶省力  
寒暄冷暖各相關

食淡

海國煎鹽價萬尋，持籌恨不變黃金。  
一文羞澀無從買，淡飯春來剩苦吟。

縫綻

鍼線臨歧慈母心，誰知破碎到於今。  
未曾乞得天孫巧，偷學縫裳免捉襟。

浣衣

垢膩成團濯者誰，一身兼僕更何辭。  
鰕生齷齪心中少，不藉除煩清淨池。

滌器

潦倒慚無犢鼻褌飯餘滌器到牆根拋殘剝汁皆愁味  
若有丈君慘斷魂

粉粥

裹腹從軍諸葛糧難逢春粉療飢腸依稀退院山僧粥  
豆麥成糜木橈香

餒飯

義重難為接浙行半盂土飯亦何爭嘗來氣味非疇昔

難買香從早稻生

柳茶

竹爐煙裏想山家  
蟹眼烹來穀雨芽  
一自掉船灘溜外  
焙成柳葉當新茶

劣酒

盃中斷絕一年無  
病裏拘牽筋脉枯  
欲博微酣沽市上  
酸漿羸得滿匏壺

缺藥

藥挽參苓夢亦虛買來都是草根餘先生莫道盧扁手  
嘗然神農味不如

書傭

翁啾婦唧作家書道是參軍飽蠹魚月月供他閒紙筆  
平安兩字漫躊躇

醫匠

口傳病態索醫方虛實難憑氣脈詳總是活人心術在  
暗中調劑合岐黃

蔽席

朔風暗襲土牆頭折葦牽蘿禦冷謀孺子柴門遮片席  
不須更為杞人憂

糴桶

黑漆先生桶破來何勞劈竹作胚胎祇緣要佐餅壘用  
肯逐人間廢棄材

糞草

掃來積垢又成堆總似閒愁撥不開惟羨焚香郎有道

清風過處少莓苔

穢廁

萬石家風滌廁勤  
顛危濁氣觸妖氛  
客卿奇辱身投溷  
似此何妨捉鼻薰

溺器

交臂聯牀水火情  
撲人溲氣逼檐楹  
君非沛上真龍種  
頭戴儒冠溺不成

惡夢



一枕荒唐意奈何  
樵歌牧唱境蹉跎  
兒家穩踞風波渡  
喚醒全憑春夢婆

元旦

天時人意想陽春  
剛到春來笑此身  
滿地煙塵昏黑裏  
不堪重問歲華新

清明

昨日禁煙風雨聲  
今朝霽色屬清明  
南冠有客離鄉井  
空憶家中插柳人

至日

鐵骨寒梅待雪開朔風六管正飛灰  
老親白髮雲天外  
長憶兒曹去未回

除夜

慟哭誰憐阮籍窮空將壯志負桑蓬  
孤燈此夕更籌永  
腸斷東風聽曉鴻

撫棺

百計偷生君未能我偏求死死何曾君  
今先逝魂歸國

死後寒儒尚履冰

客俘

繫去牽來盡楚冠  
向隅飲泣各心酸  
其間獨有風僧好

笑把團扉福地安

時華林風  
僧亦被繫

老親

斑衣辜負著囚衣  
白髮親恩報答微  
未敢許人身固重

孤臣寂寞忍言歸

昆弟

秣陵泛宅錫山家一本枝開棠棣花  
姜被寒溫誰與共  
誤人多難滯天涯

憶內

抱犢田間夜辟纁於陵偕隱盼征夫  
堂前怕說南方事  
腸斷三年侍舅姑

思兒

夢到離家淚欲零  
大兒五歲次三齡  
解余手未停批點  
曾學攜書到父庭

同宗

立命堂中督課嚴讀書心遠地沈潛清修南渡司徒裔  
對策多奇愛孝廉

立命堂謂淑子兄心遠堂謂盤石先  
伯余皆課業其中孝廉謂羽斯弟也

受業

招攜琴劍別姑蘇恐類名場詩酒徒膏火幾年依別業  
釣魚臺畔學為儒

銓部張鞠存夫子見余落拓吳門攜至  
東溪令下帷數載耳提面命成就余學

同社

培園燈火浦雲深江左垂髫便入林吳會羣英名久著  
梁谿獨繫野鷗心

培園謂張嵒思雲子劉膺士諸子公路浦謂盧  
春卿薄其南孫容斯諸子江左謂王惟夏吳何  
仲程虎文侶範諸子吳會謂蔣曠生傅龍翰申  
詔生諸子梁谿謂嚴蓀友秦樂天鄒立三呂香  
令諸子

故恩

白門太史作文翁席上重裘解覆躬更有濂溪肥水老

知希為我哭途窮

白門太史程翼倉夫子出為廣文時新安富人  
以譜誼來介壽開筵觴之皆戴貂衣狐獨余單  
衫橫踞首席不勝其寒更酌犀觥來勸余量窄  
故作豪飲狀嘔吐狼藉客喧笑余瞋目大呼曰  
笑果吐酒則可笑寒則不可夫子急呵止之親  
解重裘衣我泥水周夫子來為廣文年已七十  
檢余之窮招而同牀抵足晝則買肉供我或偶  
他出則持肉食親置厨中待余下箸始愜意時  
考校余以首當補餽例有雜費始具牒上呈余  
不能措欲他避胥役恐首名不補則誤其後補  
者羣而逼余周夫子以頭觸諸胥開篋出十餘  
金付之始解夫子每至夜披衣而起喚余談遇  
合之難輒為余淚下今兩夫子  
皆作古人余無以報德悲夫

舊遊

巖壑逢迎到會稽  
儋塘花竹最淒迷  
溫陵煙雨巖灘月  
到處張帆聽鳥啼

少時同羅周師讀書會稽之儋塘末髮知心惟  
此一人羅子由中翰出為佐郡余且沈淪為難  
人矣淑子兄司李溫陵爾遐兄司李  
嚴陵余皆讀書於其署中故及之

祭墩

頑然塊木本無靈  
相伴文章奎壁星  
謝爾忘懷從不語  
一杯灑泣奠椒馨



告神

灑筆成文念頌高嶽中神主問臯陶  
盛朝刑賞天威在莫使看為弁上髦

抱犢山房集卷二

欽定四庫全書

抱犢山房集卷三

錫山 嵇永仁 撰

譜

和淚譜

并引

和淚譜者中丞公處患難中以炭畫壁所為作也何以取諸取諸文信國只恐史臣編不到老夫和淚寫新詩之句也閩難之作或者議之謂公粉飾太平則

有餘戡定禍亂則不足此語似是而非甲寅之難非  
自公始乃軍國醞釀之禍自公而受也公未蒞止先  
有蠢動機及公以孤危之身履盤錯之地文武不相  
熟兵民不相習孤拳隻掌支撐於虎口狼尾之間雖  
謀勇百倍人亦莫能有濟而況牽制功令束縛例條  
安敢輕棄封疆蹈罪履禍而為行事便宜之輕舉哉  
公被執時大罵求死不可得餓十日水漿不入口求  
死又不可得僕輩因勸之堅子卿之節俟天兵聲罪

致討目擊賊首受誅亦快心事但忠孝節義操之自我生死禍福聽之於天一旦依稀泯沒不能如草木之留根莖於人間傳聞失真紀載少實非所以砥世道回狂瀾也故於公詩互相酬和復撰和淚譜紀同難諸顛末以畧存其梗槩云抱犢山農識

和淚譜一

耶溪先生姓王名龍光字幼譽七世祖居淝水之柘皋村明初隨大將湯和經理東南愛會稽土地秀美擇而

居之相傳世有讓德至今里名讓簷蓋以此也高祖家  
素豐能濟人緩急鄉黨貧乏者多資之曾祖由明經通判  
粵中政有惠聲嘗白盜案之寃者却夜金不受其人尸  
祝公德於罷官歸里日尚匍匐而謝以故子孫忠厚清  
白皆由家訓所致先生降生時其祖母夢見高曾吉衣  
冠來家醒而燈火熒熒視之則坐草矣私卜先生後必貴  
勉之讀書補博士弟子屢挫場屋不得售同胞三人伯  
仲早棄世先生中道喪偶生子三長垂謙邑庠生次垂

訓季垂謚悉馴謹工書史數十年以來家漸陵替先生  
不樂處蓬巷有四方之志慕秦中山川雄盛古帝王將  
相碑塚存焉為驅車遍歷倦而言歸時年已五十餘矣  
范公撫浙延置絳帳教其愛子課誦講解之外一室寂  
如先生不與人較長短競得失抱璞守琛如木石然所  
以儼薄妒害之客多容之而又性甘淡泊不自言其窮  
苦於是家道日益窘范公督閩念諸客中惟先生無闕  
行敦迫偕往先生為嚴父春秋高逡巡膝下父曰范公

有德吾越不可恃之老人筋力粗健桑榆無恐汝第往  
毋內顧也先生在閩視余加厚有故人之誼蓋自浙聚  
首以至於今耳被難時爭擥者張弓矢荷戈執爰驅之  
而行如就西市狀余與先生攜手緩步雖咤叱不之懼  
私相謂曰余兩人氣誼頗同死之日願魂魄聚一處先  
生曰唯唯公撫吾浙請蠲請賑救活父老子弟億萬口  
余以一身代越人報之又何憾焉余壯其言而幸死有  
同志泉下不寂寂也是刻天光慘淡日氣昏濁余輩處



亂屍血窪中俄而迫至逆邸擾攘之頃脅余輩草安民  
檄不從誘以官爵又不從觸其怒而械繫之俄有李明  
經者受逆命說余輩以筆墨從事余輩極口唾詈又堅  
拒不之從是以幽囚兩載而至於今先生在獄無憂愠  
色日惟歌詠怡情著養花說一帙賦詩五十餘首有岑  
嘉州高達夫丰裁倦即偃卧最喜余所著百苦吟夜則  
高歌一闋已而四壁有嬉笑者有怒罵者有悄然悲而  
淚下者以此為常先生雖瘦損骨立而無疾病亦由其

懷抱曠達耳所稱達天知命之君子殆其人歟

和淚譜二

林可棟字能任福州閩縣人宋文昭公裔年六十九寡母張氏在堂苦節五十年今已九十三矣翁長子入庠早世繼娶何氏甲午孝廉琛之姊生季子文燾聘癸卯孝廉徐允登女未娶先有妾姚氏生仲子文熹已娶鄭氏女翁少時棄舉子業學吏事歷練敏幹具活人心明末時由太學生授以職辭不仕翁知天意有在避跡鼓

山欲薙髮從浮屠遊提督楊公開闢閩疆熟悉翁賢寄  
以惟幄軍興擾攘之頃翁不得已應之時山海交訌桑  
梓鼎沸翁居中多所保全總制李公初下車延翁座上  
諮以機宜翁在軍中至誠區畫瞭如指掌李公亦推心  
置腹信任不疑讀樹滋堂集其間如却紅夸請居內地  
罷勦海無益師旅以及開海復界諸條議皆非經生所  
敢捉筆更難者保孤於遺疏之中翁真報知己於存亡  
矣翁與遼左侯公善侯公曾宦於閩與翁從事戎行雅

重具人每言於范公公信而禮聘焉許御史視鹽兩浙將備舟車迎之侯公謂翁曰范公為救全閩瘡痍而來翁獨不念鄉黨赤子耶翁聞其言感激淚下堅留不去余每見翁條析疾苦事反覆太息嘆為仁人君子之心數為公稱述公不以余言為謬有忌之者造為鬼蜮語亦不敢入公耳也難作之後鞫者窮究章奏事將罪余余曰死何懼但願得一見范制府死亦瞑目時翁獨為主者呼入殿中訊之知余不免慷慨相向曰余老矣

死固其分豈忍使目中見殺才士哉願以身代嗟乎嗟  
乎鼎鑊在前刀鋸在後此時且有多方卸罪欲苟活其  
軀者翁獨奮不顧身如此彼人面狼心險惡排擠之徒  
寧不慚聳汗下乎翁於被難夜密謂余曰公死我輩誓  
無獨生理不如早相從於地下也陰以鐵鎖捩喉頸舌  
吐寸許而手軟不自支遂復甦余以手足拘攣逼摺緊  
密竟無死法邏者張燈火環而察之乃相對哽咽而已  
翁在難中遺囑其家不作一酸鼻語且以今日之死死

於名義為幸翁真達於生死之際者哉

和淚譜三

沈子天成與余同幕府但知其為華亭人敦氣節重名義者也而不知其世澤淵源家聲光大蓋沐浴忠厚之深而負隱痛焉嘗揮淚為余言曰僕本姓俞名積治字端初先世秀州人居武塘嘉禾里九世祖文莊公諱綱以諸生從龍興李善長諸公同入閣有謹厚聲自是代有聞人曾祖諱玉鼎嘉靖朝由明經為大興縣丞遷松

郡司馬防海禦倭有功歿於官留葬城西斜塘橋左郡人德之祀名宦祠祖父因家焉祖諱仰谿太學生事母孝捐貲賑荒收葬飢殍著十生訓愛周易積善之家必有餘慶尚書慎乃儉德惟懷永圖四句為子孫命名著家訓垂戒謂寧愚毋巧寧讓毋爭生八子父行四諱香林字雲槐重名節寡交遊晚年好種花兼學佛精治生十二年父見背嫡母王氏沈氏繼亡十三齡遭家難隨生母徐氏攜幼弟妹居舅氏沈公米家舅氏撫余頂曰他日

成立當繼父兄志因改姓沈更字天成拮据家務完弟  
妹婚嫁遊京師思博升斗祿養母氏慰祖父在天之靈  
茲從范公罹於難死報知己固其宜豈彼蒼不欲延俞  
氏一脈耶言訖又淚下余聞其言而不勝嗚咽也仁人  
孝子不自薄其根本而後能急人之難不自墮其家教  
而後能成人之德聞變之日干戈擾攘沈子謂余曰公  
生死未卜遽以身試鋒鏑葬亂軍手中無益姑避之余  
曰留子在為余輩收骨歸葬故里未為不可沈子避三



日夜俄聞余輩死信禱雷雨而中願出踐然諾為悖義者  
所縛獻於逆邸時鞠者正窮究章奏事將罪余沈子厲  
聲曰范公一生光明正大無陰圖人之念公且無他與  
書生何涉此細人卸禍之言也豈可憑信逆見其牴牾  
不屈遂并繫之幽羈一處然後知公及余輩尚存也沈  
子與余同寢食疾痛關切相依為命有反噬余者則批  
其頰而詈之愧之鬼怪乃遂巡辟易膽落而止余輩每  
聞公起居無恙則私心喜或聞其抱病食息不如常則

吞聲終夜飲泣蓋二三子與公爲存亡者也沈子著書一卷名聽鵲集花譜一卷載種植之事甚詳皆在難中所著述元配朱氏生四子善標善棟善棠善棣讀書於家皆稱醇謹沈子善周易卜公與余輩終且沈淪難底嗟乎先朝耀後之事不能不有望於其四子也已

抱犢山房集卷三